

# Chapir ed impedir genocids

Saira da reterats a Genevra iis 15 da decembre

DA GUIU SOBIELA-CAANITZ

**■ Il tschientaner passà è stà quel dals genocids. L'emprim commemo-rain nus quest onn: Quel da passa in milliun Armenis davent da 1915 en e tras l'Imperi osmanic. Il segund, strusch trenta onns suenter, è stà quel da milliuns gidieus en tut ils pajais suttameiss al nazissem.** Lur han ins engirà: «Mai plil!» Ma strusch in mez tschientaner pli tard ha la clicca serba che cumandava a Beograd mess ad ir la liquidaziun dals Bosniacs. Pir il 2001 ha l'opposizion democratica survegnì la maioritad e furmà la regenza. Iis 15 da decembre 2015 a las 18.30 arranscha l'Universitat da Geneva en ses Uni-Mail (auditori MS 150) ina saira cun trais referents, intitulada: «Comprendre et prévenir les génocides.» I suonda ina curta preschentaziun dals referents.

## Armens mazzacrads

Il geopolitolog Raymond Haroutoun Kévorikian (Universitat Paris VIII), spezialist da l'Armenia, ha deditgà in volum da 1008 pp. al genocid (1). Il patriarcat armen d'Istanbul aveva arranschà il 1878 e 1879 ina dumbraziun dals Armenis en l'Imperi osmanic, pia senza la regiun da Kars, lezza giada part da Russia. Tenor il resultat devi lezza giada 1914 620 Armenis en Turchia. Suenter la revoluziun dals «Jeunes Turcs» 1908 leva la regenza eliminar la maioritad cristiana da sia regiun orientala per s'expander en Persia (oz Iran) ed encunter il Caucasus (lezza giada tuttafatg russ), tant pli suenter l'entrada tirca en la guerra cunter la Russia il 1914. Kévorikian entschaiva cun l'invasiun osmanica e cun mazzacrads da cristians armenis e sirians en Persia già da favrer 1915. «En la notg dals 24 als 25 d'avrigl ha la polizia arrestà tschients persunas ord las elitas armenas d'Istanbul, betg mo manaders politics, (...) mabain er ils schurnalists ils pli renumads, advocats, medis, rec-turs da gimnasis, spirituals» (p. 315). Els ed Armenis da differentas provinzas han ins lura deportà en la regiun da Halep (Siria), lezza giada citad osmanica; en plis lieus eran las deportaziuns colliadas cun mazzacrads. Da l'atun 1915 a decembre 1916 ha l'imperi exequì la seconda fasa dal genocid: «Ils tschientmillis deportads arrivads en Siria u Mesopotamia han ins emprashunà en champs da con-contraziun» (p. 775), lura sparpaglià en

il desert da Siria e mazzacrà u laschè murir da la said. Suenter l'armistizi da 1917 cun la Russia bolschevica è l'armada osmanica penetrada en Persia ed en l'Aserbaigian russ enfin al Caucasus, pia en pajais islamics da lingua tirca (aseri), mazzacrond minoritads armenas da la regiun. La republika tirca proclamada il 1923 ha renunzià a la Siria ed a l'Irac, ma ha annexà la regiun da Kars. Plinavant han las femnas armenas rapinadas ed islamisadas stuì zuppar lur identitat. Oz snega la Turchia uffiziala anc adina la vardad davart quellas ragischs istoricas.

## La Frantscha da Vichy cunter «ses» gidieus

Il segund referent dals 15 da decembre è l'istoricher Laurent Joly, «directeur de recherche» tar l'Universitat da Caen (Normandia). Lez ha doctorà 2004 cun ina dissertaziun davart in'instituiziun creada da la Frantscha il 1941 per spogliar e zavràr ils gidieus. Da schaner 2015 ha Joly preschentà ina «thèse d'habilitation» davart la dretga extrema nazionalistica franzosa enturn 1900. Iis 16 da fanadur 1995 aveva president Jacques Chirac renconuschì la responsabladad da la Frantscha da Vichy tar l'assassinat da var 76 000 gidieus durant la Segunda Guerra mundiala: Policists franzos als han arrestads, emprashunads e surdads als nazis ch'als han tramess ad Auschwitz. En quel discurs ha Chirac fatg allusiu a l'uscheditga «purificaziun etnica» che truppas serbas commettevan gist lezza giada (fanadur 1995) cunter populaziuns bosniacas: «Quella activitat (...) pudess smanatschar l'entira Europa.» Areguard la deportaziun da gidieus tras la Frantscha punctuescha Joly en sia te-sa la responsabladad da primminister Pierre Laval (1883–1945) e dal chef da la polizia René Bousquet (1909–1993). La liberaziun dal pajais 1944 ha abolì il reschim da Vichy e restaurà la republika.

## Srebrenica (1995)

Il terz referat fa la schurnalista Florence Hartmann, anteriura cussegliera tar la Curt penala internaziunala per l'anti-riura Jugoslavia (CPIJ). La cuminanza en dumonda dapi il davos decenni dal tschientaner passà è la bosniaca (oz var dus milliuns olmas), quella populaziun slava, islamizada en il 16avel tschientaner, che viva en l'intschess da la Bosnia-Erzegovina (oz 3–4 milliuns olmas) cun la chapitala Sarajevo (369 534 olmas). Il

1992 ha la Bosnia-Herzegovina sa declerà independenta sin la baza d'in referendum; l'Uniun europeica ha renconuschì il stadi nov. Truppas serbas l'han dentant cumbatti bloccond e bumbar-dond Sarejevo. A Srebrenica (Bosnia) hani mazzacrà tranter 7000 ed 8000 giuvens ed umens bosniacs (fanadur 1995). Pon ins en lez cas discurrer da genocid? Gea, din la CPIJ, la Curt internaziunala da giustia da l'ONU ed ils blers politichers dal mund. Na, din singulas personalitads – sco era la Russia, tradiziunalmain serbofila. Sin quai replitgesch'ins ch'ina haja mazzà «mo» ils umens e laschè ir las femnas. Gea, ma quai pon ins era dir dals assassins osmanics: I han mazzà «mo» ils umens armenis, las femnas han ins «mo» islamisà e tichisà. La finamira da las mazzacras, en Bosnia sco en Turchia, era d'extirpar la cultura da l'auter pievel. «Serbs armads han violà millis Bosniacs, femnas ed umens, e quai publicamain (...). Quai cumprova ch'i levan destruir las famiglias da lur praschuniers e cuzzunt lur vita sociala e lur identitat. Las violaziuns repetidas e mutilaziuns sexualas da Bosniacs (...) miravan ad extirpar lur pievel» (1). Suenter las mazzacras da Srebrenica «ha la cuminanza internaziunala decidì da reagir fermemain a mintga provocaziun serba. Iis 28 d'avust èn 37 civilists morts en in bombardament da Sarajevo. Il di suenter e durant passa trais emnas ha l'aviatrica da l'Allianza atlantica (...) bombardà massivamain las truppas serbas (...). Ins ha lura suttascrit il contract da pasch iis 14 da decembre a Dayton en l'Ohio» (2). Il 2013 ha president Tomislav Nikolic (Serbia) declrà: «Jau sper ch'ins perdunia a la Serbia per il malfatg da Srebrenica.» Ma Dayton ha francà saivs balcanaisas novas tranter duas «entitads»: Ina Federaziun da Bosnia-Erzegovina (2 371 603 olmas, chapitala Sarejevo) ed ina Republica serba (1 326 991 olmas, chapitala Banja Luka), domaduas commembraas dal stadi numnà Bosnia-Erzegovina. «Seis ein in signal» (Cristian Collenberg, LQ, 1. da decembre 2015, p. 20). Co va quai vinavant?

1. Raymond H. Kévorikian, *Le génocide des Arméniens*. Paris (Odile Jacob, ISBN 2-7381-1830-5) 2006.
2. Thierry Mudry, *Histoire de la Bosnie-Herzégovine*. Paris (Ellipses / Éditions Marketing, ISBN 2-7298-5753-2) 1999, p. 241.
3. Thierry Mudry (sco nota 1), p. 237.